

四庫全書

子部

欽定四庫全書

冊府元龜卷九十二

宋 王欽若等 撰

帝王部

赦宥第十一

後唐莊宗同光元年四月己巳即位於魏州升告禮畢  
御應天門改元肆赦制曰法天取象令王以降衷下民  
東籙承乾哲后以膺圖受命莫不運推歷數道濟艱難  
經綸於草昧之中式遏於亂略之始君臨兆庶子惠萬

邦壽域將登眚災是宥朕顧慙涼德誠媿前修祇荷鴻  
休恭修清問將布維新之政是覃革故之恩遐按彝章  
溥頒成憲爰自夙承丕構世奉本朝誓雪耻於君親欲  
再安於廟社所以躬提義旅力殄凶徒漸致小康永清  
中夏俄屬列藩羣后不謀同辭咸稱偽逆干天宗桃夭  
享眷命所屬主壻攸歸以朕籍係鄭王志存唐室合中  
興於景祚須再造於洪基推戴既堅讓辭靡獲既難違  
衆遂命有司乃擇元辰率尊前典尋升壇而奠玉仍即

位以建元欽若舊章敬敷霈澤宜改天祐二十年為同  
光元年可大赦天下自四月二十五日昧爽已前除大辟  
罪已下罪無輕重已發覺未發覺已結正未結正咸赦  
除之唯犯十惡五逆火光行劫持刃殺人官典犯贓屠  
牛鑄錢合造毒藥不在原赦之限鎮州自收復已來累  
行告諭或因緣危艱為保家族久在山中寨柵懼罪遲  
疑或被張文禮脅從事不獲已者昧爽已前一切不問  
咸從赦宥宜體予懷應六軍及行馬步蕃漢諸道將校

兵士等皆以身先冒刃志切勤王或竭節於忠勞或連年而征戍須加恩獎倍撫苦辛其將校尉竝賜功臣名號未有官者即起一子與檢校官已有官者亦起一資如官資已高者與加爵邑如曾封爵者即給一子六品已上正員官其長行兵士竝賜功臣多應將士等竝勒逐處各定等第優賞應有大勲上將元老重臣或盤維每賴於急難或邦國早資於經濟即安義令公實昆仲之長護軍特進同骨肉之恩不可以名氏標文不可以

臣下同等嘉庸如在崇德未申其次有戰沒陣場身終  
王事須顯忠彝之美咸隆贈諡之榮周德威蓋寓李存  
璋李思恩李嗣本李存進伊廣等兼應該勅文者竝委  
中書門下各令所司一一具錄聞奏各加追贈仍定諡  
號貴流王澤永飾泉扃應諸道管內有高年踰百歲者  
便與給優永俾除名自八十至九十者與免一子免役  
州縣不得差役鄉里有孝子順孫義夫節婦委在所長  
吏錄其節行具以聞奏盡據典章必行旌表内外文武

官及諸色人任封事兼有賢良方正抱器懷能或利害  
可陳無所隱諱直言極諫將一一行之亦委諸道長吏  
具姓名申奏或所在有義行頗高為鄉里所推者竝仰  
準例舉選所司量才任使澤潞封疆兄弟之國進思舊  
績言念疲民惠在綏懷恩加招撫各仰沿邊鎮戍布命  
宣陳咸令樂業營生使無侵疆為患應有奉使危邦罹  
殃殊域既遭陷害深可憫傷如伊鐸蓋寓戴漢超李承  
勲之徒竝仰所司具名錄奏朝廷必議褒贈其貢舉之

道誘導為先切要便行貴申獎士委中書門下速商量  
聞奏其雲應邊陲北山八軍易定幽燕邊陲諸縣自鮮  
卑入寇仍歲纏災睠彼流人良堪興歎或乍來復業纔  
擬營農尚怯侵擾須加慰恤其稅率仍委長吏量與矜  
減凡有逋毒孤貧憐嫠寡歷代皆聞於教化自古共  
切於軫傷勉致噢咻遍加惠養應有欠負不繫公私若  
曾重出利累經徵理填還不追者竝皆釋放夫掩骼著  
在前經敬神垂於古典告布諸道州縣所在應有暴露



骸骨竝勒逐處埋瘞及山林川澤祀典神祇各隨處差  
官崇修祭享教之為本禮儀是先德之所崇昭報在上  
其民間有曾經三世已上不分居者竝與蠲免諸雜差  
徭倘兵銷患息何須有丹鳳白麟若歲稔人和何必有  
紫芝赤鴈起今後諸道應有祥瑞竝不要奏聞其赦文  
中有未該詳事節者即仰所司條件錄奏如敢以赦前  
事相告者以其罪罪之

十月己丑御崇元殿降德音曰伏順討逆少康所以誅

有窮績業承基光武所以滅新莽咸以中興景命再造  
皇猷經綸於草昧之中式遏於亂畧之際朕以欽承大  
寶顯荷鴻休雖繼前修固慙涼德比以誓平元惡期服  
本朝屬四海之阡危允萬邦之推戴近自親提組練徑  
掃氛妖振已墜之皇綱殄偷安之寇孽國讐方雪帝道  
爰開拯編氓覆溺之艱救率土倒懸之苦粵自朱溫構  
逆友貞嗣凶篡弑二君隳殘九命虺毒久傷於宇宙狼  
貪肆噬於華夷剥喪元良凌辱神主帝里動黍離之歎

朝廷多棟撓之危棄德崇姦窮兵黷武戰士疲勞於力  
役蒸民既竭其膏腴言念於斯軫傷彌切今則已梟逆  
豎大豁羣情覩歷數之有歸顯神靈之匪昧得不臨深  
表志馭朽為懷將弘濟於艱難宜特行於青宥應偽命  
流貶責受官等已經量移竝可復資徒流人放歸鄉里  
京畿及諸道見禁囚徒大辟罪降從流已下竝赦除之  
其鄭珏等一十一人未移復之限懋德賞功百王明  
訓疏封列爵國有通規應扈從征討將校及諸官員職

掌軍將節級馬步兵士及河北諸處屯駐守戍兵士等  
皆情堅破敵業茂平讎副予戡定之謀顯爾忠勤之節  
竝據等第續議獎酬其有交鋒戰陣沒於王事未經追  
贈各與贈官如有子孫成立堪任使者竝量才甄錄叛  
之則懲服之則捨蓋前經之與旨為當代之通規既屬  
纂承是務遵守應舊偽庭位居藩翰任處專城或掌握  
兵權或捍防邊鄙各為其主以全其名既解甲以歸明  
或飛章而送款變通斯覩忠節可嘉其逐處節度觀察

防禦團練等使及諸州刺史監押及偽庭先差出行營將校都監等竝頒恩詔不議改更仍許且稱舊銜當候別加新命理國之道莫若安民勸課之規宜從薄賦庶遂息肩之願冀諧鼓腹之謠應諸道戶口宜竝罷其差役各務營農新係殘欠稅賦及諸務懸久積年課利及公私債負等其汴州城內自收復日已前竝不在徵理之限應天下諸道自壬午年十二月已前竝放其兵戈蹂躪之地水旱災沴之鄉苗稼不登徵賦既減應今年

經霜旱所損田苗處檢覆不虛便據畝隴蠲免兼北京  
及河北先為妖祲未平配買征馬如有未請却官本錢  
及買馬不迨者可竝放免往哲弘仁有興滅繼絕之道  
前王惻隱垂矜孤恤寡之文應有本廟宗屬及内外文  
武臣僚被朱溫無辜屠害者竝可追贈之如有子孫及  
本身逃難於諸處漂寓者竝所在尋訪津送關庭當行  
升陟其有義夫節婦孝子順孫竝宜旌表門閭量加賑  
給或鰥寡孤獨無所告仰者所在各議拯救或有身過

八十者免一子從征殷王以恩推解網竝務好生帝堯  
以引過責躬乃思含垢應有先投過偽庭將校官吏等  
一切不問事繇無令輒有恐動側席求賢將臻至理懸  
旌進善或贊鴻猷應名德有稱才藝可取或隱居朝市  
或遁跡林泉竝逐處長吏遍加搜訪津致赴闕朕當量  
才任使兼偽庭僭逆已來凡有冤抑沉滯之人宜竝特  
與申雪仍加遷陟封遺冢而葬枯骨義出周王祀名山  
而祭大川禮傳虞帝既立規於前古足垂訓於後昆應

所在賢士丘墳竝仰聞奏當議封樹或有暴露骸骨亦  
委逐處壅埋或有百神祠宇不得有虧時祭應德音內  
有節文不該者竝仰所司重具起請分析聞奏當議施  
行於戲患難以平成自忠良之力瘡痍未息宜施撫育  
之恩更在文武元臣中外耆德覩覆亡而立戒竭忠盡  
以為謀無縱驕矜須知廉慎同致昇平之道永全開創  
之功布告遐邇當體朕懷

二年二月己巳朔有事於南郊禮畢還御五鳳樓宣制



曰體元立極樹司牧者大君創業開基定禍亂者真主  
是以肇分正氣斷鼉足而定四維耿覲玄風抗龍首而  
朝萬國兆人歸往率土駿奔同興牧野之師共赴塗山  
之會恭行弔伐廣示驅除纔應順於人心俄恢張於戎  
畧未踰半歲悉集大功剪窮后於夏郊擒漸臺於新室  
配天纂祀寃耻咸申向闕來庭華夷率服再移星律得  
事郊禋獲申報本之義已展告虔之禮顧惟寡薄愧畏  
尤深久屬偽室兇狂彝倫失序照臨之內愁疾畧同爰

當改物之辰乃布維新之慶與人更始以答天休可大  
赦天下應同光二年二月一日昧爽已前大辟罪已下  
所犯罪無輕重已發覺未發覺已結正未結正見禁囚  
徒常赦所不原者咸赦除之十惡五逆屠牛鑄錢故意  
殺人合造毒藥持杖行劫官典犯贓不在此限賞不失  
勞百王令典人惟求舊有國通規當宜廣示優恩務酬  
嘉績應自來立功將校兵士等皆久經戎陣備覩辛勤  
竝宜各轉官資仍加賞給應偽朝流入并左降官未經

量移者即與量移已量移者即與復資尚慮道路遐遙  
未盡知悉中書門下再舉勅文應内外文武常參官節  
度觀察防禦刺史主軍都指揮使等夙夜在公冰泉斯  
戒既著顯親之道宜嘉事主之誠父母亡歿竝與追贈  
追封在者各與加爵增封四品已上扈從翊衛整肅威  
儀展我國容俾成大禮應南郊掌儀仗隨駕官員各有  
勞獎其扈駕樓下立仗將士及河南將校兵士等亦各  
賜等第優賞賚惟盡瘁言念輸忠率玉帛以來庭贊郊

廟而貳事既崇丕烈特顯殊恩凡闕竭力之元勲宜舉  
報功之茂典應藩鎮使臣各賜一子出身仍加功臣名  
號諸道留後刺史官高者加爵階一級官卑者加官一  
資宗子維城本支百代禮既行於配祖情敢急於睦親  
應本朝皇親近屬因緣偽梁竄遁遐遠竝仰所在搜訪  
如非謬妄即與奏聞到京委宗正寺簡勘不虛竝與量  
才叙錄網羅之中無由自奮蜂蠆之內竟至無辜既淪  
沒於濫刑宜申明於真節凡本朝內外臣僚枉被朱溫

殺害者竝仰所司具銜申奏特與追贈仍搜訪子孫量加叙錄事主之道以立節為先致理之方以賞善為本其懷才抱器不事偽朝衆所聞知顯有節行仰所在長吏將所著狀具姓名聞奏當別甄獎兼授官秩皇王御宇禮三恪而為賓士庶敦風賴五常而濟世當宜封崇後嗣欽若前修應前代二王三恪及文宣王之後竝可各令繼襲仍加恩命所有祖宗廟宇亦宜各與增修其隨處合得俸戶并子孫戶下差稅征徭仍委中書門下較

本朝格律施行堯鼓明懸貴聞進諫舜旌旁建比為來  
賢是宜廣納話言庶箴闕政洎偽梁人滋澆薄朝掩忠  
良蔑聞投水之規莫識從繩之路此後應內省文武常  
參官并前資草澤之士有謀分利害事既機宜竝許上  
表數陳朕當選長旌錄如有性多毀譽私貯愛憎承寬  
偶恃於得言縱志惟專於罔善朕亦潛令伺察親要審  
詳狡蠹有彰罪刑無捨錢者古之泉布盖取其流行天  
下布散人間無積滯則交易通多貯藏則士農困故西

漢興改幣之制立告緡之條所以權畜賈而防大姦也  
宜令所司散下州府常須檢校不得令富室分外貯見  
錢又工人銷鑄而為銅器兼沿邊州鎮設法鈐轄勿令  
商人搬載出境被服錦繡貴賤有倫裁製衣裝短長有  
度苟無彛則必害女工近年已來婦女服飾異常寬博  
倍費縑帛有力之家不計卑賤悉衣錦繡念蠶織之匪  
易顧法制之不行須示條流冀漸遵守委所司散下文  
榜曉諭御史臺及諸道觀察糾舉違勅水旱之鄉而饑

寒宜恤兵戈之地勞弊堪傷鄴城及河東久興師旅頗困生靈其近裏州縣又輦運徭役無時暫息應北京以北諸州界及至新州幽州鎮定管界契丹侵掠井邑凋殘兼遼州沁州南界及安義北界澤州諸縣河陽向下至鄆濮齊棣已來邊河州縣數年兵革至甚凋殘自此竝宜倍加撫安召令復業應人戶所輸租稅特與蠲減已從別勅處分兼諸道州縣有經霜水旱之災所損田苗納稅不追懸欠處仰子細簡詳如不虛妄特與蠲放



頃以未殄寇讎常勞戰伐況於邊鄙足見凋傷既歲月  
滋深在逋逃而可念或主持錢穀管係牛羊既已罄空  
須憂徵督將叶來蘇之詠宜施在宥之恩應近邊界州  
縣人戶有舊主持官錢斛斗牛羊諸雜課利送納不迫  
者竝令蠲放自兵屯郊境事迫機宜互有侵漁交相虜  
掠既變良而為賊實威脅以勢驅人或銜冤朕寧無慮  
可各下諸處有百姓孀女俘虜他處為婢妾者願歸即  
竝不得占留一任骨肉識認其丈夫曾被刺面者仰勘

所在村保如委不係食糧人數便勒本州府各與憑據  
放逐營生鄉村糴貨斗斛及賣薪炭等物多被牙人於  
城外接賤糴買到房店增價邀求遂使貧困之家嘗買  
貴物秤量之際又罔平人宜令府縣及御史臺於諸門  
嚴切條流不得更相違犯應天下見使斛斛竝是偽朝  
所定宜令所司別造新朝斛秤頒下諸道其見使者納  
官毀廢三館蘭臺藏書之府動盈萬卷許列九流爰自  
亂離悉多遺逸須行搜訪以備討尋應天下有人能以

經史及百家之言進納者所司立等第酬獎喪葬之典  
合式具言使貧者足以備其儀富者不得踰其制項自  
淳風漸散薄俗相承不守等威競為僭侈生則不能盡  
其養沒則廣費飾其終自今後仰所司舉名條制勿令  
踰越若故違犯嚴加責罰歷代以來除桑田正稅外只  
有茶鹽銅鐵出山澤之利有商稅之名其餘諸司竝無  
稅額偽朝已來通言雜稅有形之類無稅不加為弊頗  
深興怨無已今則軍須尚重國力未充猶且權宜未能

全去且檢天下桑田正稅除三司上供既能無漏則四方雜稅必可盡除仰所司速簡勘天下州府戶口正額墾田實數待憑條理以息繁苛國以人為本人困則國何所依人以食為天食艱則人何以濟聞偽朝已來恣為掊斂至於雜色斛斛柴草受納倉場邀頡人戶分外誅求納一斛則二斛未充納一束則三束不了互相蒙蔽上下均分疲斃生靈莫斯為甚自今後仰長吏選清強官吏充主納仍須嚴立條制以防姦欺兼具逐色所

納加耗申奏當官者宜守於朝章力田者宜遵於王制  
苟容僥倖必亂規繩訪聞富戶田疇多投權勢影占州  
縣不敢科役貧下者更代征徭轉致凋殘最為蠹弊將  
安疲瘵須擇循良應偽庭內班朝僚及諸色主掌職員  
等遭無辜菽害者竝許昭雪歸塋共理者太守之官親  
人者縣宰之任戈鋌稍弭政術為先刺史縣令有勸課  
農桑招復戶甲增加稅額檢勘不虛委本道觀察使條  
件奏聞當加進陟如貪墮不理害及於人者速便停替

務於葺養稱朕意焉況親人之官無先於令錄致理之道必擇於才能苟選任不自於朝廷則恩澤全歸於侯伯今日諸道奏請授官人數轉多闕員全占交隲體例須正條綱委中書門下舉舊例條理聞奏刺史總一州之政縣令專百里之權至于糾督之司竝謂親人之任偽朝取士多不擇才蓋自藩方奏論及因權勢屬託公行賄賂蔑顧典章到官唯務於追求在任莫思於葺理或聚蓄更希後任或掊斂以報前恩上下相蒙遠邇為

害生靈困斃職此之繇自此牧守令錄之官委中書門下精加選擇至于三銓注擬亦在審詳吏能如貪猥有聞不得更授令錄及到官後委本道觀察使切加鈐轄仍勒本州判官專為訪察如掩贓罪不具聞奏豈唯獨罪本官兼亦累及長吏至於義夫節婦孝子順孫竝合搜揚以行旌表德音之所未至赦文之所不該凡百有司各宜申舉於戲圓盖方輿布陰陽而貿萬物賢臣聖主守紀綱而馭四方所寶者黎元所重者神器久落姦

兇之手每傷忠義之心朕以訓練五兵憂勤三紀收復而親經百戰輯寧而敢忽萬機得不居安慮危慎終如始內則委樞衡於元輔庶顯彌綸外則分符印於列侯務觀製緝股肱惟肅宗社是依朕有過而須言臣有善而無掩使百姓時序萬國咸寧共全可大之功式表中興之道

四年正月壬戌制曰蓋聞兵者凶器戰者危事故聖王不得已而任之是以大兵之後必有凶年朕自收復汴



州戡定蜀郡雖當時秋毫無犯而已前乃十載勞師每  
歲傷夷寧無災殃言功於已曾莫繼於百王語德於人  
况未洽於兆庶遂至去歲水潦為災自京以東幅員千  
里田疇悉多荒廢人戶未免流亡賦租既輸納不充軍  
食又轉運未及物價騰踊人心煎熬既視人如如傷每  
敬天而忘戒朕近欲親幸梁宋徧恤生靈又恐大駕省  
方百司云從道途寧免勞擾州縣復備供承轉慮凋殘  
莫知攸濟朕自今月三日已後避正殿減常膳徹樂省

費以答天譴應同光三年經水災處有不追及逃移人戶差科夏秋兩稅及諸折配色委長吏切加點檢竝與放免仍一年內不得雜差遣見在者加意撫恤流徙者設法招攜其田宅無信有力人戶占射及鄰近毀拆務令歸復以惠傷殘且念給養兵戎撫綏疲瘵冀連營而粗濟思比屋以乂安危困生靈倍懷憂切近者爰頒御札務切濟時有所便宜朕無不聽近歲賦稅尚恐懸闕遠年逋欠豈可督征不惟虛係於簿書兼亦轉困于生

聚致其流散職此之繇應壬午年已前百姓所欠秋夏  
殘稅及諸色課利錢物先有勅文悉已放免近聞或不  
遵守依前却有徵收仰下租庸司及諸道州府切準前  
勅處分如或更有違越任百姓詣闕論訴當議勘窮以  
定贓罪其同光元年當戰伐之後是平蕩之初人戶流  
離多未復業困於租賦須議矜蠲其諸色殘欠差稅及  
不追係官課利竝與放免分明曉告各遣聞知又輦轂  
之中郊甸之內時物踊貴人戶饑窮訪聞自陝以西遐

及邠鳳積年時熟百穀價和縱未能別備於貢輸亦宜  
廣通於糴糴近聞輒有稅率已曾降敕指揮尚慮關鎮  
阻滯行人增長物價仰所在長吏切加檢勘以濟往來  
推救災卹患之心明奉國憂人之道又京圻之內自全  
義制置已數十年每聞開墾荒蕪勸課稼穡曾無歉歲  
甚有餘糧公私貯蓄極多收藏未肯出糴欲俟厚價頗  
失衆情宜令中書門下條流應在京及諸縣有停貯斛  
斛竝宜減價出糴以濟公私如不遵行即仰聞奏別具

檢括仍委河南府切詳勅命處分伐罪弔人既叶前王之令推恩布澤敢忘當代之憂應三川管内王衍父子偽署將相文武官及諸色職吏等除罪名顯著已從刑憲外脅從者固是無辜同惡者亦以歸命一切釋放更不勘尋仍不得將今日已前事干有告論貴宣曠蕩之澤以安反側之心我國家奄有四海垂三百年西之日入罔不來賓凡有遐方皆我赤子久陷僭偽寧無憫嗟應三蜀管内百姓除秋夏兩稅及三司舊額錢物斛斛

并繼爰崇韜申奏減落徵收外所有無名配率急徵橫  
斂毒害生靈者更委本道新除節度使到後於館內一  
一檢勘細具聞奏當與放免俾惠傷殘應在京及天下  
州府凡有繫囚除十惡五逆官典犯贓屠牛鑄錢光火  
劫舍持刃殺人準律常赦不原外合抵極刑者遞減一  
等竝貸餘生其次罪等悉與減降疏理釋放不得久有  
禁繫自同光元年後或有犯罪流人情非巨蠹者竝許  
歸還應行營及在京諸軍皆役管健偶因過犯便至奔

逃懷憂懼以離家忍饑寒而在外事非在已情亦可矜  
委所在如有比色人切加招撫或要却歸都幕或願逐  
便營生盡捨愆尤悉皆聽許春以生而秋以殺天之道  
也德以教而刑以威君之政也朕惟寡薄敢忘憂勤唯  
將德惠以臨人庶免灾害之及物既垂天戒未致時雍  
爰施布澤之文是表責躬之道中外臣庶遐邇生靈宜  
體朕懷罔有不敬

是時天下州府相繼奏戶籍流亡及  
舉家凍殍者數千帝憂恐減膳徹樂

故降此德音蠲除雜賦  
人已流殍無所及也

明宗天成元年四月丙午即位甲寅御文明殿受朝改  
元肆赦制曰天生蒸民樹之司牧立君臣之位定治亂  
之機撫之則為后王虐之則為讎敵以今況古何代不  
然先皇帝親總干戈而奄宅區夏功既成而稍忘戒懼  
道未濟而不慎驕矜遂致貪吏藏姦羣小多辟勲舊無  
名而被禍忠良飲憤而見危比屋由是怨咨連營以之  
愁歎俄成否運遂至橫流朕昔奉武皇而幼聆明訓早  
承締構備歷艱難敢忘作礪之規以奉維城之固一昨



趙在禮遽從其羣徑入鄴都一則迫於饑寒從其糧穀  
一則痛於離析就彼妻孥朕既事於專征亦冀成於靖  
亂豈意羣情見迫衆意相推雖於擾攘之中彌勵扶持  
之節無奈軍中散卒亂若焚絲闕下禁兵勢如烈火繇  
是指河流而南渡誓軍旅以西馳志欲救於顛危情冀  
申於忠赤豈謂兵搖畿甸釁結蕭牆慙赴難以無功徒  
撫心而掩泣深誠未達羣議同詞以為奉廟社之烝嘗  
紹宗祖之基業軍民所繫神罷難虛辭避雖至于再三

推戴尤形於迫切竟將寡昧獲奉宗祧御朽索而敢載  
馳涉大川而莫知往夙夜戒懼罔敢底寧所賴中外蓋  
臣弼予冲眇援今引古爾既以大寶尊予濟國安民予  
亦以忠貞賴爾庶將此道共致治平宜推更始之恩以  
布維新之化今以改同光四年為天成元年鄴都赴難  
之際定策功臣宜特恩以彰豐報其扈從將士及六軍  
諸衛諸道行營將校等委中書門下次第酬獎夫人不  
能自理立君以理之豈可殫天下之賦租為宮中之玩

好後宮內職量留一百人其餘任歸骨肉臣守閣掌扇  
量留三十人教坊音聲量留一百人鷹犬之事以備蒐  
狩量留二十人御廚膳夫量留五十人其餘任從所適  
內諸司使務有名無實者竝從停廢先皇運關外之糧  
資供維中之戎馬遂致百姓困弊者不勝餽輓之勞今  
則須為制置令度支與總管使會定在京兵數據所供  
饋積貯京師其近畿糧儲可令諸軍就食諸道營田租  
庸司先專差務使無益勸農起今後竝委州使管係所

納農具斛斗據數申省應納夏秋稅糧先有省耗一升  
起今後只納正數不得別量省耗其輸芻橐亦不得別  
徵加耗征賦上供國之常典別申進獻懼削生靈今後  
節度防禦等使除正至端午降誕四節量事達情自於  
州府圓融不得輒科百姓其四節刺史不在貢奉諸州  
使造麴如聞省數之外長吏私更加造價錢多入於私  
門滯麴常存於省數省司及諸府置稅茶場院自湖南  
至京六七處納稅以致商旅不通及州使置雜稅務交

下煩碎宜定合稅物色名目商旅即許收稅不得邀難  
百姓諸道監務破腳價極多獲租課極少須有條流以  
成規制租庸司先將係省錢與人回圖所供課利或爛  
茶弊物積年之後和本乾沒為弊最深宜令盡底收納  
以塞倖門已上五件委三司使條理聞奏力學登第承  
蔭出身或欠文書寢成踰濫先遭沒毀幾至調選無人  
州縣多是攝官為弊滋甚宜令銓別為起請止除偽濫  
餘復舊規昨自魏汴至京大將所歷戎馬騰踐麥苗下

本州使檢量據所傷殘與蠲地稅自今年四月一日已  
前竝與放免如已徵入州縣者即據數納省若取宮中  
回圖錢立契取私債未曾納本利者不在限其餘竝不  
徵理先緣漕運京師租庸司應借私船今既分兵就食  
停於漕運其諸河渡私船竝仰却付本主如有滯留許  
本主論告先朝屢降德音所司不與宣行遲留奏改利  
在虐人赦書所至仰三司諸道丁寧宣布限一月內便  
須施行不得遺漏條件仍於要路榜壁貴示衆多嗚呼

除舊布新雖更於法制承祧繼世敢怠於纂脩惟上天之匪忱則下民之康定水能利物有載舟覆舟之文言可立身有興邦喪邦之喻敢不日慎一日業業兢兢庶乃三事大夫百辟卿士共修正道以啟遠圖復先皇帝已墜之基副億兆人相推之意冀上天之悔禍迴下土之沉憂雖唐堯之茅茨土階夏禹之惡衣菲食納隍馭朽不憚於憂勤履薄臨深無忘於夙夜必能自勵以慰人情惟爾尊獎之誠興復之志有始有卒是所望於羣

公無怠無荒冀不移於薄德凡百有司宜體朕懷

是年十一月庚申敕應天下州使繫囚除大辟罪已下  
委所在長吏速推勘決斷不得旁追證對經過宿食之  
地除當死刑外竝仰釋放兼不許徵理天成元年四月  
一日已前私債所降德音節文仰王京諸道分明宣布  
於要害道路榜壁不得漏落今則上聞違犯其後來相  
次條理諸道事件皆關念及生聚布以優恩多因州使  
倖門淹留敕命或公然隱匿全不施行官吏但習舊風



百姓罔知親命宜令徧加告諭

二年二月丙申曲赦京城臺府軍巡見繫囚徒十月辛丑詔曰朕聞后來其蘇動必從於人欲天監厥德靜宜布於國恩近者優恩多因州使倖門淹留勅命或公然隱匿全不施行官吏但言幸浚郊暫離雖邑蓋逢歲稔共樂時康不謂姦官遽彰逆狀為厲之階既甚覆宗之禍自貽俾我生靈遘茲紛擾永言軫惻無輟寐興宜覃雨露之恩式表雲雷之澤應汴州城內百姓既經驚劫

須議優饒宜放二年屋稅兼公私債負如是在城回圖  
錢物及公私質庫除點檢見在外實經兵士散失者不  
計年月遠近竝宜蠲放兼不得輒差配管內戶有因納  
稅入州便值更變或散失車牛其車牛許本主識認勤  
王之節雖自勲賢入貢之勞抑繇於使介其有諸道進  
奉使或已入汴州陷失土貢宜與收破無勞重有貢輸  
專人經劫奪者宜與優給不軌之徒已加顯戮無辜之  
士當慰幽冤馬彥起宋景殷等宜與追贈逆人有子及

弟姪者仰竝釋放一切不問輦輅之下姦逆遽興既難  
戢於戈鋌因莫分於玉石昨王師攻下汴州之時剪除  
兇逆之際恐其士庶偶陷鋒鏃言念傷殂良多嗟憫宜  
令石敬瑭徧加存問兼勘在城殺傷人口奏聞量加給  
恤衛主亡軀摧兇致命偶徇脅從之勢終懷忠藎之誠  
首議向明理宜行賞昨車駕初到城下之時有將士率  
先開門及下城朝見宜令石敬瑭奏聞當與甄酬禁暴  
戢兵實由武德安民和衆乃契天心車駕自離雒京戒


嚴兵士不配一物不役一夫河流井水此外無取尚恐  
州縣以迎駕為名妄有配率如或察知必不容恕布澤  
之命必叶於羣心宥過之文庶臻于至理應天下諸州  
府見禁囚徒除十惡五逆殺人光火劫盜合造毒藥官  
典犯賊偽行印信屠牛外罪無輕重竝宜釋放瑕疵可  
滌既責其自新稂莠未除必從於去害應諸道或有人  
先偶曾為非及有背役衙官懼罪藏隱宜令隨處長吏  
設法招携各勒歸家一切不問諸色人不得輒有搖動

如或自守狂迷尚且結集當令嚴加捕捉無致遁逃貴  
靜封隅永安黎庶策名筮仕誠切於進身制祿命官義  
從於責實既懲黷貨宜有代耕應天下州縣官員逐月  
俸料如聞支給多不及時縱或支遣皆是爛弱斛斗既  
闕供輸難責廉慎自此隨處官員所破料錢宜逐縣人  
戶於合送納稅物內計折充支一則免勞於人戶輸納  
一則便於官僚仍下三司速與計度掄選之道雖在精  
研調業之勞頗聞艱苦應選人內有過格年深無門參

選縱有材器難遂趨宜令三銓磨勘行止即與今年  
冬集判成選人例量材注官如或詐稱不在此限為政  
之要切在無私聽訟之方唯期不濫天下諸州府官員  
如有善推疑獄及曾雪冤濫兼有異政者當具姓名聞  
奏別加甄獎敬老之規前王所重養親之道為子居先  
應有年八十已上及家長有廢疾者宜免一丁差役俾  
遂奉養計國之心忠貞為本承家之法孝友為先應天  
下有孝子順孫義夫節婦兄弟繼世義居者隨處長吏

聞奏當行旌表嫌疑之釁多起於倉皇似是之非率難  
於明辨應去年四月一日諸州府軍變內有誣誤身沒  
者竝許子孫禮葬頃以兩軍對壘仍廢交鋒亡歿甚多  
暴露不少宜令滑濮鄆澶衛等州各據地界內有暴露  
骸骨竝與埋瘞仍差官致祭其餘諸道州府有暴露者  
亦委長吏指揮埋瘞夫天灾流行時雨愆亢既闕地分  
宜減國租今歲岐華登萊自夏稍旱須加軫念以示優  
恩四州所管百姓宜令長吏切加安卹其所旱損田苗

宜令檢行詣實申奏與蠲減稅租仍不得有差徭科配  
於戲罪已責躬前王之大德滌瑕盪穢往世之深仁致  
逆孽之亂常蓋眇冲之寡德誠深惕厲罔敢怠荒既行  
逮下之恩當守不移之信更在朝廷卿士藩翰侯王同  
交奉守之心共致治平之道宜布遐邇當體朕懷





冊府元龜卷九十二

欽定四庫全書

子部

冊府元龜卷九十三至六

詳校官中書<sub>臣</sub>瞿 照

員外郎<sub>臣</sub>牛稔文覆勘

總校官庶吉士<sub>臣</sub>何思鈞

校對官中書<sub>臣</sub>徐步雲

謄錄監生<sub>臣</sub>俞成鰲

欽定四庫全書

冊府元龜卷九十三

宋 王欽若等撰

帝王部

赦宥第十二

後唐明宗長興元年二月乙卯郊祀畢還御五鳳樓宣制曰王者法天爲子長人爲君必在於上奉天明下從人欲奉天莫先於孝敬從欲莫先於矜寬則必上下叶和陰陽調序朕顧惟寡德猥紹丕圖祇荷景靈敢不寅

畏屬以域中作梗邊土多虞繼除梟獍之妖累殄豺狼之族阻行大禮于茲五年負芒刺以靡寧積氷湯而為懼今幸五兵偃戢百穀豐登謁清廟以寫心陟泰壇而瀝懇孝敬之道誠益勵於夙宵寬宥之懷固難忘於頃刻上承玄祐異永無疆之休下念黔黎宜覃莫大之慶况天地交泰之始雷雨作解之初布澤益示於滂沱發號重新於渙汗滌瑕蕩穢屈法申恩宜改天成五年為長興元年可大赦天下應諸道見禁囚徒十惡五逆光

火劫舍屠牛官典犯賊偽行印信合造毒藥外罪無輕重已發覺未發覺已結正未結正咸赦除之其天成四年十二月終已前諸道府人戶應有殘欠稅物蠶鹽食鹽乾摧濕摧既係積年之欠俄逢作解之恩竝與免放諸州府營田戶部院應欠租課房店利潤逃移人戶死損牛畜或先遭剽劫及水滯處欠負斛斛無所徵填已收納到家產財物其餘所欠竝與蠲除所在倉場積年損壞使臣盤覆欠折尤多其主持專知官等據通收

到產業物色外亦與放免應諸道商稅課利撲斷錢額  
去處除納外年多蹙欠枷禁徵收既無抵當並可放免  
諸道採造材木欠數定州材木錢及閩鄉船務遺火所  
司累行催促無可填納亦與放免先南北兩軍前倉場  
持主損爛欠折及江河轉運拋失舟船並斛斛茭稈錢  
諸鎮欠少過軍準被粮草等據主持人在家業勒收  
納外餘放所欠天成元年二月諸州般納到上供庫秤  
盤積欠物色并遭兵火燒劫及耀州前後身死刺史界

分欠省庫錢物劫勒州司官吏賠填者並特放免天成  
二年終諸色人於西川省庫內借過錢並省司先差人  
收買羊馬欠折死損無填還及天成二年終已前諸道  
銅銀鐵冶銀錫水錫坑窟應欠課利兼木炭農具等場  
欠負亦與放免諸州府或經水旱灾沴恐人戶闕欠餵  
糧方值春時誠宜賑恤宜令逐處取去年納到新好屬  
省斛斛各加賑貸候秋收日徵納完數應天下府州合  
徵秋夏苗稅土地節氣各有早晚訪聞州縣官於省限

前預先徵促致百姓主持送納博買供輸既不利其生  
民今特議其改革已令所司更展期限輔相之榮必資  
德望公侯之貴蓋選賢能欲展徽猷貴在彰顯內外羣  
臣職位帶平章事兼侍中中書令與改鄉名里號欲通  
和氣必在申寃將設公方實資獎善州縣官僚能雪寃  
獄活人生命者許非時選仍加階超資注官與轉服色  
已着緋者與轉兼官其朝臣及藩侯郡守等亡父母祖  
父母在并妻室未霑恩命者竝與追贈及叙封應有諸



色私債納利已經一倍者只許徵本年外欠數並放納利已經兩倍者本利並放昭宗太祖莊宗時或有犯罪籍没人若有子孫在者並許識認上祖墳塋主祭庄田已係官及有主承佃不在識認之限河陽管內人戶每畝上舊徵橋道錢五文今後並放不徵諸道州府人戶每畝上元徵麴錢五文今特放二文只徵三文敢以赦文前事告者以其罪罪之赦書有不該者所司各具條例聞奏夫施令覃恩比期及物苟有壅滯曷浣焦勞如

聞近年赦書所在不廣宣布為人臣者豈若是乎其在  
輔弼公卿藩侯郡守各輸忠力副朕憂勤共致治平永  
躋仁壽仍令御史臺嚴加訪察無縱稽留赦書日行五  
百里告諭天下咸使聞知

五月勅曰本朝列聖受冊徽號多施霑澤蕩滌瑕疵今  
緣纔過南郊不可便行大赦其中有恩未及者宜示優  
矜其諸色官員中或有經罰殿停替者宜竝許以停任  
時官資理選數赴調其諸徵科不了勒定州縣官等除

已赴南郊行事該恩外慮有在外赴行事不及者宜  
並準上許理選序貴普沾於恩惠免永滯其身名俾  
得自新皆期受任

二年四月己巳勅旨應諸色官曾貶官者昨遇郊天量  
移近地想能知過宜漸服勤其量移官等各與特恩流  
竄者更與寬宥乙卯勅久愆時雨深疚予心雖遍虔祈  
猶未溥足宜廣推恩之道更敷恤物之懷貴獲感通必  
彰靈應宜令諸道州府各委長吏親問刑獄省察冤濫

應見禁囚徒除犯死刑外餘晝時疏放除省司主持迴圖敗闕軍將及諸色人等見別指揮三司商量或有情可矜憫或非欺罔積年致有逋懸各具分析續行勅命并公私債負放至秋熟填納今年取者不在此限

四年八月戊申冊尊號禮畢制曰朕聞為而不有曰天使而不知曰道下覆萬物中含兩儀難以常名加難以常德報是故賢君哲后則而象之雖有唐堯之聰明不伐其善雖有夏禹之勤苦不矜其功朕善愧唐堯功慚

夏禹屬六十年亂離之後承億兆人塗炭之餘兒童悉  
習於戰爭者艾罕聞於聲教強吞弱吐禮壞樂隳涼德  
眇躬豈易為治所賴王公卿士戮力一心善無細而不  
行惡無大而不去革彼積弊成斯小康夫化自心生平  
其心則化洽令從身出正其身則令行朕御茲九州迨  
今八載嘗懷戒懼罔敢怠荒每務推心感人謹身率下  
刑必有罪豈以喜怒而死生賞必有功豈以親讐而厚  
薄却雕鏤之靡麗慮淫巧以蕩心罷畋獵之游娛恐逸

豫之敗度未能全臻於富庶未能盡偃於干戈誠宜業  
業以兢兢詎可自尊而自大中外文武不謀同辭謂朕  
弘清淨之風載以廣道樹生成之德而推之以法天堅  
讓固辭至于數四遏之不止去而復來雖義乃爾心深  
可嘉也而名過於實良所惕焉既大舉於徽章宜溥覃  
於霈澤可大赦天下應八月四日昧爽已前在京天下  
州府見禁囚徒已結正未結正已發覺未發覺罪無輕  
重常赦所不原者咸赦除之長流人并諸色徒流人不

計年月遠近已到配所竝放還或有亡命山澤及為事  
關連逃避人等竝放歸鄉一切不問如過百日不歸首  
者復罪如初在京諸道將士各與等第優給應貶降官  
未復資者咸與復資州縣官內有先為事勒停止者竝  
許參選殿犯者免其所殿長興三年正月一日已前  
諸道兩稅殘欠物色並宜減放或有先曾經災沴處  
逃戶却歸業者除見徵正稅外不得諸雜科徭切  
委倍加安撫應係省司場稅倉庫今日已前諸色

敗闕人等據其所有錢物家業盡底收納已上所欠  
並敗闕人並放其間未曾經歷磨勘點檢者宜令省  
司便與磨勘點檢準前處分將來永不得任使如  
是雖稱敗闕省司未見申報文狀及見今勾當人已後  
敗闕於中錢穀或涉降赦文年分竝不得援此為例山  
林草澤之人雖頻命搜羅而尚慮沉滯委所在長吏切  
加採訪的有才氣義行者具以名聞必議量才任使在  
朝文武臣僚并諸色職員有直言極諫者如上封章盡



當開納諸凡無主丘墓自兵革已來經發掘者宜令觀  
察使刺史差人量事掩瘞敢有赦前事相告者以罪罪  
之於戲滌瑕蕩穢宇宙繇是澄清布德推恩遐邇以之  
胥悅所望藩垣羣后社稷諸臣既尊予以莫大之名當  
佐予以彌高之德日慎一日雖休勿休驅彼疲民置之  
壽域光爾在位顯我得人

愍帝應順元年正月戊寅受朝於明堂殿大赦改元

末帝清泰元年四月乙亥即位乙酉帝袞冕御明堂宣制

曰王者司牧兆民寵綏四海爰屬統臨之始宣布渙汗之恩仰測天心俯從人欲所以春夏秋冬四時先布於發生草木禽魚萬彙乃期於蘇息伏念大行皇帝承天眷祐立極艱難繫予眇躬當佐興運櫛風沐雨從湯征而多歷勤劬匣劍繫弓贊周道而克成底定爾後繼持玉節獲受桐珪事君必盡于忠誠為子益堅於孝道諒穹蒼之可鑒與宗社之永寧旋屬杞國人憂荆山鼎就痛攀髯之靡及念同軌之將臻爰自汧岐徑朝伊雒所

箕宿參蜃輅親奉山陵纔覲宮闈旋承告令百辟堅陳  
於勸請三讓莫諧六師共切於推崇羣情益固昔夏啟  
以謳謠有屬能承大禹之基漢文以將相叶心克嗣高  
皇之業顧惟小子豈逮前王自續鴻圖如登虎尾惟當  
慎終若始居安慮危保七百載之延昌致億兆人之開  
泰將布改元之令爰敷在宥之文宜改應順元年為清  
泰元年可大赦天下四月十六日昧爽已前內外見繫  
囚徒據罪已發覺未發覺已結正未結正罪無輕重常

赦所不原者咸赦除之應左降官及徒流入與量移已  
量移者更與量移已放歸者量與叙錄應内外文武臣  
寮節鎮州府等使刺史文武職員將校並與加恩應自  
鳳翔扈駕員寮凡主兵主事者各賜功臣名見在京隨  
駕并諸道馬步將士並與等第優給並從別赦處分自  
二月十四日西來文武參佐沒於王事者各與追贈仍  
叙錄子孫隨駕前資文武官寮並量才任使鳳翔民李  
存劉寶罄出家財以助軍賞並與命官起事之初鳳翔

三城民戶多遭燒燬竝宜本道檢視量給瓦木工價各令修葺自岐雍華陝已來王師所經踐履去道參里內夏稅竝與放免應三京諸州府長興三年十二月已前欠夏秋殘稅竝與除放其鳳翔即自長興四月十二日終已前竝放

二年五月乙巳御札曰王者父天子民深居高視恭已以行道褒賢以勸功蓋以上承天休下除民瘼率輦下以勸天下自一人而惠萬人為子為臣不可不察朕惟

寡德獲纘不圖奉先聖之神靈荷皇天之眷祐寅畏夕  
惕罔敢遑寧思與將相王公良牧賢宰共敷政教同致  
雍熙繇是詳酌政刑搜求利病以今觀古夜思朝行才  
濟於時雖蒿萊而必采言干於道雖誹謗而必容然而  
近歲已來多事之後邊陲尚擾府庫未殷扞防必假於  
兵師供饋須資於民力既未能便停征伐固不可頓減  
賦稅念乃疲羸勞於鑒寐今歲爰自初夏稍屬愆陽朝  
昏正積於焦勞祈請果垂于甘澤所宜行慶以答殊休

言念狴牢之人屬此鬱蒸之候苦毒之狀所不能言況當長養之時特降哀矜之令應王京諸道州府見禁囚徒自五月十二日已前除五逆十惡光火劫舍持杖殺人官典犯贓偽行印信合造毒藥外委逐處長吏據已發覺未發覺已結正未結正不在追呼支蔓只正身招罪便疾速斷遣并見欠省司錢物外諸罪無輕重一切釋放應天下藩侯郡守令錄等為我股肱作民父母必在精窮事理杜塞倖門副我憂勤察民疾苦刑獄不可

以阿曲法令不可以滋章私不得害公利不得傷義長  
思砥礪共致隆平凡百庶官宜體朕意

晉高祖天福元年十一月己亥即位於晉陽御崇元殿  
肆赦改元制曰古者君臨大寶子育黎民爰當御歷之  
初宜布惟新之令將冀昭蘇品物蕩滌瑕疵大推作解  
之恩俾樂咸亨之運恭以明宗皇帝經綸草昧統御寰  
瀛垂衣而八表歸心負宸而十年無事必謂盤維永固  
鼎社無遷立萬代之基圖為百王之軌範洎遺弓劍遂



起干戈逆豎延灾宗英失守劫奪神器侮亂天常誅戮  
至親虐害無告顧予何咎忽有異謀無名而大舉甲兵  
不道而廣勞生聚震中板蕩天下驚騷內外離心遐邇  
積怨嗷嗷士庶若無所依契丹皇帝不忘先朝特存舊  
好親提銳旅遠殄羣兇未整鸛鵝盡殲蛇豕而復念中  
原之無主憫四海之倒懸欲泰羣情特申大義猥惟涼  
德俾纂寶圖成命不迴固讓莫得殷湯以東征西怨乃  
踐帝圖夏禹以地平天成遂興王業矧予寡昧有愧推

崇雖勉副羣心恭臨大位將何以祗膺眷祐統和人神  
以是馭朽興懷宵衣在念躋生民於富壽保社稷於延  
洪頒歷紀年既有遵於典冊推恩行慶將普及於幽遐  
宜改長興七年為天福元年大赦天下十一月九日昧  
爽已前應在京及諸州郡邑罪犯及曾受偽命職掌官  
吏并見禁囚徒已結正未結正已發覺未發覺罪無輕  
重常赦所不原者咸赦除之應曾相連賊黨軍人百姓  
有奔竄山谷者一切不問任歸本貫如却願在軍者亦

仰所司申送當令本軍收管易俗移風宜遵善教尊本  
敬始自有常規應明宗朝所行勅命法制仰所在遵行  
不得改易悉力為時罄財助國苟不推於恩信亦何示  
於賞酬自舉義已來應借率人戶及經抄括商旅資財  
錢物委所司明置文籍候平定之後當議給還京城將  
士降附軍戎自舉義以來悉聞忠盡宜加賞賚以勸勤  
勞應在京諸軍將領兵士等候並破賊寨當議各加優  
賞有沒於王事者各與贈官其子孫並與量才叙用文

武官寮等又輸推戴之誠宜示獎酬之道應在京及文武官寮及軍府將校并勸進官等兼前資官內自五月後來未曾分掌職任並各與遷轉官資自五月後來已曾受官者不在此限其軍府諸色職掌將吏等已及押衛職者各與遞遷職次鹽麥之利軍府所須倘不便放戶人宜別從於條制所期濟衆無患妨公在京鹽貨元是官場出糴自今後並不禁斷一任人戶馭使雜易仍下太原府更不得開場糴貨其麴每斤與減價錢三十

文恩推掩骼義顯燭幽允諧遐邇之心冀叶陰陽之序  
應自舉義已來或有因事抵法之人及九月十四日後  
殺戮賊寇所在暴露骸骨未有骨肉收認無主者委逐  
處長吏埋瘞弓旌聘士巖穴徵賢式光振鷺之班將起  
維駒之應山林草澤賢良方正隱逸之士委逐處長吏  
切加採訪咸以名聞當議量才叙任昨以寇戎久在郊  
境頗傷禾稼賦租應近京畿五十里內委逐處令長檢  
覆當與免今秋稅租差科於戲甘澤配天萬物以之膏

潤震雷出地百卉繇是發生將欲道和氣於八方示深  
仁於三面永康聖歷普洽民心凡百庶寮洎方伯連帥  
克奉明恩勉揚厥職共臻至化稱朕意焉敕書日行五  
百里敢以赦前事言者以罪罪之布告中外咸使聞知  
閏十一月辛巳入雒壬午詔御史府促朝官入見勅曰  
朕遠提義旅尋尅皇都六部相次以奉迎兆庶畫時而  
安堵旋茲底定已遂廓清應文武百官等早列通班各  
懷忠節掩跡雖淪於汚俗推誠必候於維新但當共罄

嘉謨副予虛佇虞秦可鑒在於用捨之間堯舜為心方  
務含弘之德勉堅臣節深體朕懷其兩班臣寮應事偽  
庭者竝宜釋罪是日百辟謝恩於行宮之外甲申御文  
明殿受朝賀用唐禮樂制曰蓋聞神無常祀惟德是歆  
民無常懷非賢不乂歷數有歸者人祇共贊文明懷遠  
者龜筮叶從所以周開七百之基夏作三王之首伏自  
莊宗失馭天下分離萬國懷賢三靈改卜明宗皇帝潛  
符景運克紹寶圖一莅寰區八周星律偽主從珂始因

微績序在維城遇大國之多艱以列藩而入統勦絕裔  
嗣屠害忠良臨大寶而罔以德聞御諸侯而惟將威脅  
朕以明宗皇帝每弘厚遇益勵微誠無纖粟而使人可  
疑無絲毫而事君不謹豈期深苞禍釁暗抱猜嫌欲用  
奸謀擬相魚肉初以北門之事委朕一生忽將汶上之  
田遷予十乘二三其德始終違心既欲害於無辜孰肯  
扶其不道而遇北朝皇帝英明鑒古威武冠今嫉彼不  
平閔予多難遂致累殲允寇繼納降兵每借巨功俾成



大業朕自興基構頗厯艱難冀兆億而保安敢興寐而輒怠今則重光日月再造乾坤宜覃在宥之恩以布鼎新之命可大赦天下今月二十九日昧爽已前應在京及諸州府凡有所禁囚徒已發覺未發覺已結正未結正罪無輕重常赦所不原者咸赦除之雷雨作解瑾瑜匿瑕宜加盪滌之恩用示包容之應中外諸色職掌官吏有受偽命者一切不問既除巨蠹亦愍俱焚難全者須正呂刑可恕者特開湯網偽庭賊臣張延朗劉延皓

劉延朗等竝姦邪害物貪威弄權罪已滿盈理難容貸  
除此三人已行勅命外其有宰臣馬肩孫樞密使房暉  
宣徽使李專美河中節度韓昭裔等四人雖元事偽庭  
咸居重位每持忠慤不務詭隨偽主不任才謀遂致傾  
覆朕昔在藩邸備所諳知今竝釋放一切不問應中外  
官寮之外有自舉義已來歸順者委中書門下別加任  
使應偽庭貶降官未量移者與量移已量移者與復爵  
受官亦與復資應徒流收管人竝放還伏以少帝地居

嫡裔位纂洪圖王從珂始構異謀非理屠害一家骨肉  
將正承祧之典式敦敬始之名宜令中書門下追尊定  
謚擇日禮葬妃孔氏宜行追冊祔塋應有宿舊臣寮並  
與量加叙用昨者舉義之地稱師之邦必蹂踐於川原  
要矜蠲於輿賦其河東管內諸縣稅租今年秋及來年  
夏稅各與減放一半警蹕經過之地望幸雖榮蕃漢雜  
處之兵禁暴難備既頒渥澤頒示優矜昨大將軍兵士  
自河東以至京畿公路擾踐之處宜委逐處長吏公當

檢覆據頃畝特與蠲放今年秋稅一半朕昨於霸府創  
置新軍救時昔在於從權卹下今徇於所欲河東所有  
新招置義勝軍人竝放逐便賞罰二柄激勸萬方倘稽  
甄獎之恩何答勤劬之效應扈駕及相次歸順軍都竝  
與重加優賞但緣宮內庫藏虛乏宜令三司疾速抽徵  
諸道稅物以充賞給其指揮使等竝與超轉官資五月  
後來已曾受恩命者亦與依資轉官高懸朗日炤臨必  
備於遐邇大扇仁風亭育罔遺於纖芥應天下歸順節

度使刺史下賓席郡職及將校等委中書門下各與改  
轉官資覆車難襲弊政宜遷恤鄉邑之瘡痍救民人之  
疾苦其北京管內鹽當戶合納逐年鹽利昨者偽命指  
揮使每斛須令人戶折納白米一斛五升極知百姓艱  
苦自後宜令人戶以元納食鹽石斛數目每斛依時價  
計定錢數所取人戶便隱折納一人湯沐之奉實在王  
畿兆民凋弊之風宜行仁恕其碁京管內逐年所配人  
戶實鹽起從來年每斤特量減價錢十文應道州府所

徵百姓正稅斛斛錢帛等除係省司文帳外所在州府  
竝不得裏私增添紐配稅物應有懷才抱器隱遁山林  
方切務於旁求宜遍行於搜訪委所在長吏備達朝旨  
具以名聞致仕官或筋力未衰才能可任將表乞言之  
敬難從歸老之心委中書門下商量奏聞當議昇擢義  
夫節婦孝子順孫委逐道奏聞當加旌表應自起義已  
來或盡節捐軀歿於王事宜加褒贈兼恤妻孥俾義激  
於忠貞庶恩霑於幽顯鳴諫鼓以俟讜言列柱石以申

寃滯將聞善以自戒思與物以垂恩備著前規用光大業或直辭可貢或有理可矜各務奏陳皆當鑒納明宗朝屬之內宿舊之中或功名曾著於輿情或材氣可裨於公政宜委中書門下量才叙錄闕防凡有征稅省司曾降條流慮多時而或有隱藏因肆赦而再頒條貫應諸道商稅仰逐處將省司各收稅條件文牒於本院前分明張懸不得收卷榜內該名目分數者即得收稅如榜內元不該說著係稅物色即不得收稅宜令所在長

吏常加覺察如敢有違條流不將文牒張懸將不合係  
稅物色收稅欺罔官法停滯商賈盡時具名申送奇伎  
淫巧往誥不容務實去華哲王所尚應有浮虛假偽之  
物不鬻於市肆委所在常加覺察犯者加重刑責士流  
之內有懷才抱器碩學殊能者委中書門下搜訪任使  
勿拘門地資歷於戲愛民如子王者之所以勃興損已  
從人眇躬而安敢自忽况朕驟主百靈之祀創開萬乘  
之基朽索在懷求衣益勵更賴庭中多士閭外諸侯咸



罄良籌共裨不逮初寧鯨浪適啟龍圖冬陽開溫炤之光  
春雨灑涵濡之澤惟新正令不宰玄功中外臣僚體  
予深意

二年四月甲申入汴州丁亥制曰歷代省方蓋觀風而  
設教前王展義皆利國以便民雖今古以有殊在皇上  
而無異朕艱難創業宵旰臨朝每軫念於瘡痍敢自辭  
於癰瘡近以浚郊粵壤梁苑名區乃舟車通會之都實  
人物殷繁之地春秋租稅可贍給於兵師遠近蒸民免

煩勞於饋運爰從清雒遂整鳴鑾六飛既議於按巡四海漸期於開泰今則已臨汴水宜順薰風思覃渙汗之恩特布如綸之命普安區宇首念狴牢况當長養之時曲示矜寬之澤應天福二年四月五日昧爽已前諸道州府見禁囚徒大辟已下罪無輕重竝從釋放凡關布澤務在及民宜加軫憫之恩俾遂蘇舒之望天福元年已前諸道州應係殘欠租稅竝特除放諸道係徵諸邑人欠負省司錢宜令自偽主清泰元年終已前所欠者

據所通納到物業外竝與除放或水旱為灾虫螟作沴  
儻無軫恤何致阜豐朕昨行至鄭州滎陽縣界路旁見  
有虫食及早損桑麥處委所司差人簡覆量與蠲免租  
稅河陽管內酒戶百姓應欠天福元年閏十一月二十  
五日已前不敷年額麴錢竝放其諸處應經兵火者亦  
與指揮當罪即誅式明常典既往可憫宜示深仁為主  
清泰中臣僚內有從誅戮者竝許收葬要荒之內鄉黨  
之中宜弘養老之規式表問年之道天下百姓有年高

八十已上者與免一子差徭仍令逐處簡置上佐官過  
滎陽而因思紀信屈夷門而尚想侯嬴著高義者猶足  
歎嘉蹈忠節者固宜旌賞事資激勸恩在褒揚梁故滑  
州節度王彥章勅命當時致身所事凜千年之生氣流  
百代之令名宜令超贈太師子孫量才叙錄亡命藏姦  
此自撓搶之際好生惡殺宜弘曠蕩之恩應諸道州府  
管界內有自僞命抽點鄉兵之時多是結集劫盜因此  
畏懼刑章藏隱山谷宜令逐處曉諭招携各令復業自

今年四月五日已前為非一切不問如兩月後不來歸  
業者即令所在長吏嚴加捕逐復罪如初於戲撫俗安  
民御宇式明於敏政行慶施惠為君用顯於推誠況潛  
躍之時開創之始外則五侯九伯協力裨助內則四輔  
三公同心翼戴已寧華夏實賴忠良既光帶礪之勲無  
忘盤盂之誡凡百有位更竭乃誠共致隆平永輔寡昧  
布告遐邇宜體朕懷

八月乙巳制曰雷雨作解表天道之推恩瑾瑜匿瑕顯

國君之含垢顧惟師古敢怠弘仁關河既靜於昏霾綸  
綍宜覃於慶澤昨者張從賓輒萌逆節遠結叛臣釁起  
三城悲纏兩地占據我都邑虔劉我士民九泥欲閉於  
虎牢祆霧幾迷於鳳闕賴乾坤垂祐將相協謀渠魁送  
死於網羅兇黨咸膏於原野捷音繼振惡蔓皆除宜施  
曠蕩之恩以撫驚騷之地仍頒霈澤徧及縲囚貴感召  
於淳和速盪平於氛祲天福二年八月二十五日昧爽  
已前天下見禁囚徒除十惡五逆光火劫舍持杖殺人

合造毒藥官典犯賊欠負官錢外其餘不問輕重已發覺未發覺已結正未結正竝宜釋放應自張從賓作亂已來有曾被張從賓及張延播脅從染污及符彥饒下隨身軍將等兼安州王暉徒黨除已誅戮外竝從釋放一切不問尚恐無知之人暗有恐動物色委雒京留守河陽節度使明加察訪犯者重斷或無辜被害或徇節忘生既抱沉寃宜申贈典應自張從賓作亂已來諸色官寮內有沒於王事者竝與追贈有子孫量才叙錄或

是諸軍小節級長行已下沒於王事者具給本家三年糧賜有男成長者委侍司衛典諸軍內酌量安排富父舂喉須誅元惡文王葬骨式表至仁自張從賓作亂已來所在殺傷者竝委逐處差人收拾骸骨瘞瘞張繼祚在喪紀之中承逆豎之意顯從叛亂難貸刑章乃瞻先臣實有遺德遽茲之祀深所軫懷其一房家業準法雖已籍沒所有先臣并祖及母墳莊祠堂竝可交付親的骨肉主張應有犯事人親的骨肉除已誅戮外竝放一



切不問所有祖先墳塋亦仰準此交付負國者天地不容為逆者人神共怒永惟盱眙實有感通昨出師之時將帥虔禱頗聞陰祐成此戰功唐衛國公宜封靈顯王其餘鄭州并汜水管內神祠宜令長吏差官點檢如有隳損處便委量事修葺貴伸嚴飭以答陰功五嶽承天四瀆紀地自正當陽之位未伸望秩之儀宜令差官徧往告祭兼下逐州府量事修崇所有近廟山林仍宜禁斷採樵降黜之科既然不濫洗滌之道足使自新應自

創業已來降黜者竝可放還兵興已來邊疆多事或因  
虜掠或偶滯留歲序遷移家鄉迢遞魚腸鴈足常懸骨  
肉之恩月夕霜天必起桑榆之思宜令收贖俾遂歸還  
自梁朝後唐已來前後奉使及北京沿邊管界虜掠往  
向北人口宜令官給錢物差使齎持往彼一一收贖放  
歸本家興兵動衆蓋殄元凶伐罪弔民須安兆庶應內  
府管界內今年夏稅近指揮只徵五分今以方駐兵師  
無不勞役竝宜蠲放於戲顧惟薄德屬此多艱敢忘御

朽之規思廣納污之道爰敷渙汗貴洽蒸黎更在中外  
輔臣文武列辟同扶寡昧以致隆平告報寰區宜體朕  
懷

三年九月己巳勅魏府城內馬步諸軍將校員寮節級  
軍將長行及叅佐官員僧道百姓等朕以范延光是明  
宗舊臣與朕素敦分義因開懷而捨釋果慝懇以歸明  
君臣之義宛然金石之言無改亦繇諸軍將士叅佐職  
員同輸歸向之誠共感懷柔之道備觀忠孝深所歎嘉

將徧示於渥恩宜先行於慰撫表予大信安爾衆心應  
在城官員將校長行今日已前罪無輕重一切不問范  
延光已除授鄆州節度使賜鐵券封本郡王孫漢威等  
將校等第除授防禦團練刺史已各別行制勅命使往  
彼宣賜恩命仍令各取便路赴任恩命未到間仍且委  
薛霸充都巡檢使喬謹充副巡檢候范延光赴任後即  
可取便路發赴所任其餘將帥及參佐官吏隨職員並  
一一分析名銜奏聞當議各加渥澤其應在城馬步軍

將廳子指揮散員親從左右義勇先鋒并入馬直有馬  
步人神勇弩手鄭韜張進手下兵士并薛霸王建遣  
諸色將校衙隊名額軍都並陞為侍衛親軍排連所有今  
年冬衣見闕綿數已指揮楊光遠收寨內綿勘會俵散  
應有先被張從賓脅從符彥饒驚擾及衛州黎陽陷失  
因茲走入及隔過官員使臣將士等兼自興師以來前  
後離背軍都住彼者並不問罪其官員使臣等並與錄  
任其將士等各與依舊請受諸軍收管如有入城後遷

轉職名者便據見守職名支給請受如有諸色人輒敢  
恐動竝當深罪在城將校及諸色官員應有物業為人  
請射者竝許給還依舊為主先有抽入城義軍竝放歸  
本家如是已配在諸軍者各隨本人所願如願在軍者  
即依舊收管願歸農者即放歸本家所有府城四面人  
戶三十里內與放二年秋夏租稅三十里外委逐縣令  
佐專切點檢如實曾經砍伐桑柘毀折屋舍者分析申  
奏盡與蠲放租稅切仰招携速令歸業應九月二十五

日已前因事被殺之家不得更有論訟及相讐報妻孥家產已配沒者並給還如有自去年七月十九日後來曾經在城將校及諸色人請射合干等或為配率柴薪或為自要供燒毀折却者只據九月二十五日後見在者舍字交割其有已破除却間未數日不得更有論索如內有屬官舍字亦仰準此指揮應自去年七月十九日已前有諸色商旅或城內與城外親情相識應是寄留諸色錢物羊馬牛畜等或經括率或以沒納入官或

破罄盡不計是何公私官員寄付並不許更有論索如  
敢以敕前事相告言及相讐報者以其罪罪之朕方啟  
基局務安華夏每推誠而待物日仗信以懷來布茲誓  
言質諸天地天雄軍節度副使朝請大夫檢校刑部尚  
書賜紫金魚袋刑部李式可中大夫檢校尚書右僕射  
亳州團練使金紫光祿大夫檢校司徒貝州刺史孫漢  
威可檢校太保隴州防禦使天雄三城都巡檢使檢校  
戶部尚書薛霸可檢校司空衛州刺史天雄軍馬步都



指揮使檢校工部尚書王建可檢校司空虢州刺史天  
雄軍內外馬軍都指揮檢校戶部尚書樂元福可檢校  
司空深州刺史天雄軍內外步軍都指揮使檢校兵部  
尚書繡州刺史元霸可檢校司空隨州刺史

李式本延  
光舊客厯

數鎮從之薛霸延光妻弟自  
餘皆同惡相濟之腹心也

冊府元龜卷九十三

欽定四庫全書

冊府元龜卷九十四

宋 王欽若等 撰

帝王部

赦宥第十三

晉高祖天福三年十月戊戌勅曰天有四時首布和陽之命君臨萬國先弘曠蕩之恩所以垂青肆之文則周基遠大示寬仁之詔則漢業興隆朕猥以眇躬獲膺大寶顧惟涼薄每懼顛躋旰食宵衣恐一夫之失所臨深

履薄憂庶政之未孚雖粗致小康而未臻大化一昨灾  
躔沙鹿兵駐銅臺環甲執兵頗勞師旅飛芻輓粟重困  
生靈賴天地垂休將相出力克寧邦家永靜烟塵凱歌  
共樂於班還喜氣寶騰於遠邇豈一人之感召蓋羣后  
之扶持弓矢載橐大慶已流於中外雷雨解作普恩宜  
被於寰區庶使齊民咸霑霈澤可大赦天下應十月二  
十五日昧爽已前除犯十惡光火殺人偽行印信官典  
犯賊合造毒藥屠牛鑄錢外其餘罪無輕重已結正未

結正已發覺未發覺咸赦除之侵官潤已爾其有諸督責暴徵我所不忍應係省司課利場院官等宜依近行宣命期限磨勘徵督內有送納所欠錢物得足者其違限愆罪特放如有沒納本人及保人家業盡抵外尚欠錢物更無抵當者其所欠竝與蠲放其逐人罪犯特從減等其去年降宣命月日後來欠負者不在此限昨以水旱為沴什一未均真便蒸黎因令檢覆未明公法或彰隱漏之愆爰念小民宜示矜寬之典近令檢田有隱

漏合當罪犯者並放所有合罰令陪納租稅者特放竝令却依實頃畝輸納貨泉所聚徵督必行況係省之逋懸宜應期之供辦但以兵戈之後帳籍空存已行蠲放之恩尚憂未普再示優饒之命式表推恩天福元年應經兵火處州府諸色場院因此失陷錢物等先曾指揮蠲放一半者今竝全放未曾經減放者今與蠲放一半天灾或降地分所招携老幼以流離棄田園而蕪沒深懷惻憫宜示招安蒲同晉絳滑濮魏府鎮定等州人戶

或經亢旱或屬兵戈逃移人戶等應移戶所欠今年已  
前諸雜稅物並特除放宜令州縣曉示招携如有復業  
者仍放一年秋夏租稅二年諸雜差徭爰自攻圍每多  
徭役或因兵死尚有戶存言念傷痍屢宜優恤應差赴  
魏府城下人夫內有傷中身死者除已支孝贈外特放  
戶下三年諸雜差徭勤官奉國既彰盡瘁之誠賞善酬  
勞爰舉必行之命應魏府側近州或曾祇應供饋或曾  
部領人夫當職員僚及州縣官等宜令逐處速具名銜

分析申奏當與加恩區宇之表咸在炤臨疆場之間寧容隔限示王者之無外期國家之大同應淮南西川兩處邊界自今後不得阻滯商旅明堂欲構必自羣材大道曲全俱無棄物將期多士詎可遺賢累朝廢棄官員與量才叙用頃者借率猶有逋懸方務優饒豈宜徵督先率借雒京舍錢其所欠竝放七萃師徒五營吏士偶因罪負遂至逋逃念曾効於忠勤宜顯行於招誘自用軍已來應有諸軍及諸色負罪逃背諸處人等限一百



日內許所在陳首竝不問罪却與放管如限內不出復  
罪如舊諸州府應有見禁此色人家口骨肉竝從釋放  
恩隆加等固有明文道在恤孤宜弘異渥自去年出師  
來諸軍將校有沒於王事者子孫竝與量才叙錄臯陶  
五刑既從流放商王一德用解網羅想其憔悴之容爰  
示哀矜之道應貶降官與量移已量移者與復資流配  
人等竝放還仁及枯骨澤渥重泉睠哲后之芳蹤乃有  
國之令典魏府管內用軍已來墳墓所毀無主者委逐

處官吏指揮隨事修整祭奠仍費官中支給賦歛未省  
杼軸猶空言念疲羸聊得蠲貸諸道州府營田戶部院  
務省莊等天福元年秋夏租課錢帛斛斗諸雜物色等  
除已納外應有逋欠竝與蠲放於戲萬靈蠢蠢生成咸  
賴於上玄六合茫茫舒慘悉由於元首朕每興念慮莫  
釋焦勞遂覃在宥之恩將合好生之德朝野士庶中外  
臣僚體予蕩蕩之懷而贊我巍巍之治無怠於協謀戮  
力共期於偃革修文並勵乃誠永俾寡德布告遐邇咸

使知聞

六年八月己亥帝至鄴壬寅制曰自昔聖皇明帝膺圖  
受命必觀風而設教或展義以省方上則順彼天道下  
則從其人欲朕創開基業每遵舊章期四海之混同法  
五載之巡狩乃睠全魏肇啟新都頃屬經綸當茲潛躍  
宜從望幸俾慰來蘇遂整鳴鑾旋臨舊地雷雨作解式  
覃曠蕩之恩日月無私用廣昭臨之道應三京新都諸  
道州府天福六年八月十五日昧爽已前諸色罪犯已

結正未結正已發覺未發覺罪無輕重常赦所不原者  
咸赦除之其持杖行劫并殺人賊免罪移鄉仍配逐處  
軍都收管其犯枉法贓人雖免罪即不得再有任用或  
始因罪犯久處竄流特行洗滌之恩各遂歸還之望應  
配流人并已前逢赦不在放還人等并放還徒罪年限  
未滿者竝放偶負瑕疵爰從黜降俾量移於近地宜漸  
復于舊資應貶降官等未量移者與量移已量移者約  
資叙進用或歲因災沴民用艱辛久係逋懸宜示蠲免

應欠天福五年終已前夏秋稅租并公徵諸色及營田  
租課竝與除放朕頃當開創爰在并汾或傾歸順之心  
首謀翊戴或擁驍雄之旅力效推崇洎汜水興妖鄴城  
伐罪每令致討皆立奇功漸臻開泰之期愈念艱危之  
際宜頒殊渥允答茂勲應河東起義之初佐命效順收  
復鄴都汜水立功臣僚將校等竝與加恩其亡歿者更  
與追贈子孫已有官職者與遷改未有身名者與叙用  
經過郡縣迎奉乘輿既供億以為勞宜旌酬而示寵自

東京至鄴都公路供頓官員職掌等竝與加恩六飛行  
幸萬騎扈從慮旁午於路岐微損傷於苗稼應公路有  
傍道稍損却田苗處其合納苗子及公徵錢物等據畝  
數竝與除放載念雀臺昔居侯服撫綏六郡臨蒞四年  
睠彼職員依然父老無怪推恩之典仍敦尚齒之風鄴  
都并相澶貝博衛等州官員職掌內有頃歲潛龍時在  
職者竝與加恩管內耆老八十已上者竝與版受上佐  
官為國之規利物為本農器俾從於改革畊民必致於

便宜諸道鐵冶三司先滌䟽百姓農具破者須於官場中賣鑄時却於官場中買鐵今後并許百姓取便鑄造買賣所在場院不得輒有禁止攪擾擢文武之才今之急務旌孝義之行古有明文贊治道以克隆致人倫之式序山林草澤內有文才武藝為衆所推者委長吏切加搜訪具以名聞當議量才叙用孝子順孫義夫節婦竝與旌表門閭天覆地載無所不容改過自新於斯為美應亡命山澤負罪潛藏者竝放罪招携各令歸業所

在切加安撫如過百日不出者復罪如初唐室忠臣鄴  
臺靈廟濟蒼生於一境正皇統於中區宜命褒崇用彰  
激勸唐梁國公狄仁傑與追贈官秩主掌曠敗錢物逋  
懸宜示矜容聊加蠲免應天福三年終已前諸色場院  
官欠負官中錢物人等累經徵理通勘實無錢物家業  
者竝與除放其人免罪任從逐使不得再任使無黨無  
偏徇至公之道去泰去甚戒求利之心私下債負徵利  
已及一倍者竝與除放如是主持者不在此限邊陲管



界蕃部經繇言念疲羸良深軫恤祁代蔚并鎮州管界  
內有經蕃部踐踏却苗稼者其合納苗子沿徵錢物等  
據頃畝與除放其經燒爇舍室殺傷人命者據戶下合  
徵苗稅竝與除放於戲居域中之大為天下之君按巡  
既展於盛儀渙汗宜覃於慶澤人情允洽帝道有光更  
期忠藎之臣永贊隆平之運布告遐邇知朕意焉  
七年正月戊午以收復鎮州曲赦廣晉府禁囚及襄州  
鎮州惡黨一百餘人

少帝以天福七年六月即位七月庚子御正殿制曰古  
先哲王開創丕業未嘗不櫛風沐雨旰食宵衣安黔首  
於八紘保鴻圖於萬世恭惟先皇帝艱難啟運恭儉臨  
朝以武功定寰區以文德安黎庶日慎一日無怠無荒  
載洽隆平永傳基構顧惟冲眇獲奉纂承念負荷以  
為難集哀摧而罔極期終喪制旋逼羣情竭推戴以彌堅  
執讓辭而不獲勉臨大寶以御兆民宜頒在宥之文用  
布惟新之澤可大赦天下應天福七年七月十七日昧

與已前四京及諸道州府諸色罪犯除十惡五逆殺人  
強盜官典犯賊合造毒藥屠牛鑄錢諸色偽造外其餘  
罪犯已結正未結正已發覺未發覺咸赦除之已前諸  
色配流人等除終身不齒常知所在縱逢恩赦不放還  
人及曾為強盜已配諸處收管人外其餘竝放還其今  
日已前放還人內舊有職官者量與叙用弔民伐罪用  
遵懲勸之恩改過自新必務含弘之道其襄州安從進  
如能果決推誠一稟朝旨竝從捨釋各與官榮朕恭承

顧命初嗣丕基而文武羣臣中外良佐肅清輦轂保佐  
國家備彰忠孝之心咸竭推榮之力宜覃恩渥用表旌  
酬在朝內外臣寮侍衛諸軍將校及諸道節度使防禦  
團練刺史並與加恩修奉園陵考詳故實務遵禮典副  
朕孝思凡曰在官悉能陳力爰逢昌運宜示溥恩諸道  
賓幕將校職員見任京六品已下官州縣官三司場院  
監治帶使額者普與加恩其諸道職員押衙已上與轉  
官兵馬使已下與轉職懸車官秩前任職資載敦尚齒

之風爰示念功之典致仕官前任文武朝臣內諸使司  
已下前任節度使防禦團練刺史行軍兵從少月上佐  
官前諸道都指揮已下前任京六品以下官及前資州  
縣官帶使額場院官等並與加恩京師職掌夙夜勤勞  
竭力有聞推恩無吝應在京諸司職掌亦量與恩澤奉  
守文之業敦孝治之風宜加幽顯之恩用慰哀榮之意  
內外臣僚內諸司使及侍衛諸軍指揮使已上父母在  
者與官封已有官封別與遷改已亡歿者並與封贈已

有封贈更與妻封贈其有郡邑國號者與進封未有者  
與叙封曾竭臣誠歿於王事良深悼往宜示賞延自天  
福元年後來文武臣僚中有歿於王事與追贈已追贈  
者更與加贈有子孫未有職官者與錄用蝗蟲作沴苗  
稼重傷特示欽蠲俾令蘇息應諸道州府經蝗蟲傷食  
苗稼者並差官檢覆據所損頃田與蠲放稅賦仍委逐  
處長吏切加安撫務令存濟山林逸士草澤遺賢將裨  
教化之風宜廣搜羅之道應有懷才抱器隱遁丘園者

委隨處長吏切在搜訪具以名聞敦崇孝義旌顯門閭  
式恢王化之基用正人倫之本應有孝子順孫義夫節  
婦委逐處長吏具名聞奏當議旌表於戲纂繼大業司  
牧羣黎小心必本於舊章恭已難忘於朽索不敢逸豫  
以召和平更賴將相大臣文武多士遵顧託於先帝永  
翊戴於冲人開保延洪爰覃渥澤報告遐邇咸使聞知  
赦書日行五百里敢以赦前事相告言者以其罪罪之  
八月丁亥以襄州安從進平詔在城官員將校職掌等

蓋被脅從素非黨類除已送赴闕外其餘一切不問自  
圍閉已來餓殍不少言念嗾冤之魄宜行掩骼之文應  
有餓死及殺戮并安從進毀折却墳墓暴露骸骨等竝  
官與埋瘞仍令致祭諸道商旅或有被安從進威脅配  
軍者竝仰給與公憑放歸本貫內有淮南商旅亦給與  
公憑放歸纂嗣之初收復之始特行軫恤用表渥恩宜  
令三司依此施行仍付所司九月癸未御乾明門觀襄  
州行營都部署高行周等獻俘馘曲赦京城禁囚



八年二月庚戌御札取今月十一日還幸東宮己未發  
鄴都曲赦禁囚辛酉幸澶州赦獄囚

五月甲辰勅曰朕荷上天之睠命守先帝之不基日午  
坐朝恐一物之失所夜分不寐思比屋之可封身雖安  
於九重心常懸於億兆屬飛蝗作沴膏雨久愆流民倍  
切於撫安征賦頻令於蠲減未能感召深軫焦勞念獄  
訟之繁當炎蒸之候欲臻和氣宜去深文特行寬大之  
恩用叶哀矜之旨應三京鄴都諸道州府見禁罪人除

十惡行劫諸殺人者及偽行印信合造毒藥官典犯賊  
外人犯死罪者減一等餘竝放內有欠官錢者宜令三  
司酌量與限監出徵理中外遐邇宜體朕意

開運元年七月辛未朔御崇元殿降制曰王者化家為  
國既開創以惟難纂業承基亦負荷而尤重朕虔承遺  
命嗣守丕圖顧眇躬而懼不克堪持小心而曾無暇逸  
外以生靈是念內以宗社為憂若涉大川如馭朽索然  
猶功非及物德不動天蟲螟為害苗之灾夷狄作亂華

之患尚賴謀臣猛將義士勇夫共成戡剪之功復致澄  
清之運今則狂戎逃遁年穀豐登時屬小康禮當終制  
雖三年無改義欲化於人倫而正朔有常理宜新於鳳  
歷爰布改元之令仍覃在宥之恩天福九年宜改為開  
運元年可大赦天下應今年七月一日昧爽已前三京  
鄴都諸道州府見禁囚徒除十惡五逆光火劫殺屠牛  
鑄錢官典犯賊偽行印信合造毒藥外罪無輕重已發  
覺未發覺已結正未結正咸赦除之流竄之徒其實有

咎和平之道亦許自新其流配人除終身不齒常知所  
在人外未經量移者與量移已經量移者與叙用蟲蝗  
灾疾之邦流夷頗甚獫狁經過之地凋弊尤深須議優  
饒用明軫憫其岐雍同華蒲陝涇邠耀威管内人户委  
長吏切在招携復業之家免一年租稅魏博貝冀滄景  
德等州曾經虜騎剽攘特放今年秋稅其餘經過之地  
亦量與矜蠲乃睦親軍實推忠節或從征醜虜顯立勲  
勞或出討叛臣方期平定至於邊陲守戍藩鎮分屯盡

繫捍防皆施勤効雖賦稅未集帑藏猶虛宜示頒宣用  
明獎賞應將校兵士量與等第優給連年失稔常賦愆  
期國用未克軍須不足是行率借以濟贍供誠非欲為  
益不獲已赦書到日盡時罷征出彼家財資予國力宜  
加甄別以示優隆出一千貫已上者特免科徭出一萬  
貫已上者咸授官秩無資給者與本處上佐有官名者  
依本品序遷竭彼臣誠沒於王事恩宜加等禮有明文  
當契丹侵犯之時有守城臨陣盡節亡身者宜令逐處

長吏以名銜奏聞當議超加褒贈或孫或子竝與旌酬  
含垢匿瑕捨過宥罪前王令典有國通規應有曾行劫  
盜之人竝宜放罪願在軍者與配軍收管願歸農者委  
本縣安存務局因循職掌敗闕空係連懸之數徒行徵  
督之文宜示哀矜竝令除放於戲承祧繼統御極居尊  
雖旰食宵衣每勤庶政而利兵秣馬未息殷憂更賴四  
輔三公五侯九伯文武叶力上下同心竭彼忠貞佐予  
寡昧舉朝廷之急務盡軍旅之沉謀使鼓卧旗偃倮成

寧謚同文共軌速洽隆平表乃有功致我無事

閏十二月乙酉以赦青州制曰高祖皇帝應天順人化  
家為國勤勞庶政安輯四方御衆以寬懷遠以德高秩  
厚祿以獎勲勞推食解衣以重賢戚至於匹夫匹婦皆  
被亭毒之恩草木昆蟲悉覃忠厚之德朕恭承丕訓嗣  
守宗祧奉以周旋不敢失墜兢兢業業若涉大川所賴  
將相公卿同德比義共扶不逮庶洽於隆平而揚光遠  
頃以微功驟升亞將後承偽命來拒義師始則為桀犬

吠堯終則背楚降漢先皇帝方弘大義推以赤心忘彼  
仇讐歡如魚水亟承重寄久綰親軍累典大藩亦兼重  
鎮邇後選男尚主待之以懿親裂地封王寵之以極致  
人臣之盛近代無儔至於諸子之中皆擢為牧守家臣  
之內多有遙領郡符比外有非理邀求違法僭濫國家  
務存終始悉與含弘奈何自至滿盈不勝富貴恩深致  
怨物盛乃衰而輒信姦邪虛有怨望聞我大喪之後乘  
我饑饉之年外則勾引蕃戎倚為勢援內則竊據城壘



潛肆窺覷遂使河朔數州頓成瘡痍青丘一境獨陷罽  
羅朕所以命將興師弔民間罪然猶堅壁拒命自夏徂  
冬固執其迷自稔其惡其子楊承勲見衆情之携貳知  
孤壘之困窮深懷滅族之憂遂有悛心之請解其戈甲  
待罪軍門梟彼兇徒而傳首於闕下氛霾遽息中外同  
懽此皆宗社降靈乾坤眷祐將帥戮力士卒齊心掃千  
里之封狐不爲民患除三穴之狡兔甚泰物情念彼一  
方未能高枕宜行在宥用拯疲羸可取閏十二月十七

日昧爽已前應諸州管內州縣見禁囚徒已結正未結  
正已發覺未發覺罪無輕重咸赦除之舍爵策勲前王  
之令典錄功旌義有國之常規應收復青州將校兵士  
等一自征行再罹寒暑頻親矢石備歷艱辛賊壘既平  
秋毫不犯雖已行頒賚而更議甄酬厚秩美名我無愛  
惜其將校自副兵馬使已上員僚并監押使臣竝與加  
恩十將已上各賜功臣名號已有功臣者更宜改賜自  
楊承勲納款歸明楊光遠亦拜章請罪朝廷務弘恩貸

而特與全生既許自新終懷憂懼遂至疾作以及亡身  
雖悖逆之人衆所憤怒在君臣之分朕實憫憐斷棺戮  
屍情所不忍其楊光遠尸首許令骨肉收葬楊承勲比  
從頑父同作不臣志力既窮覆亡可待而能轉禍為福  
全身保家果傾嚮義之心所謂見幾而作宜加恩澤以  
示獎勵其楊承勲宜與起復除授防禦使仍加官秩其  
一家骨肉竝放罪其弟承祚承信已在哀制放歸私第  
烈火焚山始識珪璋之性嚴霜殞夜方知松柏之心適

當危亂之時乃見忠貞之節故淄州刺史翟進宗清風凜物貞骨凌秋當光遠跋扈之初被逆黨脅驅之際而仗節守義經死狗忠終異叛徒以及遇害雖已行褒贈而未稱朕懷宜覃延賞之恩仍示殊常之禮其翟進宗靈櫬委本處類會本人骨肉加禮歸葬葬事官給其子仁欽可特授官資補充東頭供奉官去順效逆頗蠹人倫濟惡助姦難逃國典前登州刺史張萬迪恩隆郡寄顯受朝恩不能事君盡忠輒敢從人於亂備彰逆節須

舉明章其張萬迪宜從別勅處分尚在寬宥特免族誅  
其骨肉竝從釋放國家兵士恩澤頗隆賞賜以時衣糧  
甚厚其中有凶惡之輩輕狡之徒不顧妻孥輒背軍伍  
如期僥倖難逭嚴誅其青州城下兵士有走投入賊城  
者竝令指揮殺戮所有逐人骨肉宜從釋放叛城既下  
汚俗宜新同惡者皆就勦除詭隨者竝從停廢其餘誣  
誤宜示矜寬其楊光遠下惡黨皆已梟首所有隨幕賓  
從除已殺戮外餘皆配送邊遠州府常知所在終身不

齒縱逢恩赦不在放還之限其在城及管內州縣鎮員僚將校曾被楊光遠脅從者一切放罪亡命之人比來懼罪所宜招諭却復耕農自楊光遠作叛已來或有鄉村百姓接便遁相劫殺逃竄山林者竝皆釋放仍委本處官吏明宣朝旨招喚歸業如救命到兩月不歸者復罪如初當令擒捕顯行刑戮其莊田物業亦許力及人戶請射佃時忠力之士稟君命而不避危難良善之人入亂邦而橫遭迫脅罹茲患難實可憫傷自楊光遠作

叛之初應有差去使臣非理而死者如子孫量與量才  
叙用攻圍之際役使實煩凡有區分皆繫急速稽緩者  
固當抵罪辨集者豈惜酬勞應青淄登萊兗沂密鄆齊  
隸等州職員州縣等曾部署輦運者竝與加階減選及  
轉官加職軍旅所至雖切戒嚴營寨所經寧無踐食宜  
寬常賦以慰編氓自王師攻討逆賊大軍下寨之處所  
有田苗桑棗應遭蹂踐砍伐宜委本處官吏子細通檢  
除今年見苗供輸外來年夏稅竝與放一半其去青州

三里內更免今年秋夏殘租興師動衆勞費生靈或則  
負畚鍤以從軍或則徵輦運而赴役疲於供命不暇息  
肩言念蒸黎宜加優恤應青州管內及鄆齊棣兗沂密  
等州諸縣人戶自攻討已來差役科配頻併其今年夏  
麥殘欠并公徵錢物並與除放所有逃移戶口宜令逐  
處長吏切加招携青州城市居人等久經圍閉頗是凋  
殘楊光遠率彼資財奪其糧食至此餓殍宜示憫傷其  
在城見在貧民委本道以食糧賑恤所有城內屋稅特



放一年應洞子頭及城下夫役有遭矢石致死者宜令  
逐處長吏子細通勘與放二年徭役城郭之內餓殍極  
多墟墓之間暴骨甚衆方隆渥澤豈限幽明其青州城  
內餓死百姓及城外墳墓曾遭發掘者並令本道掩藏  
埋瘞於戲亂常干紀天地不容負國欺君人祇共怒是  
知福善禍淫之道信而有徵孤恩背義之人敗不旋踵  
今則干戈少息海岱已寧凡在股肱更思康濟庶臻治  
道同享升平布告寰區咸知朕意

二年五月丙申朔御崇元殿受朝制曰堯仁御極尚興  
丹浦之師軒后承乾亦有阪泉之戰是知五材並用王  
者不能去兵四氣同功天道不能止殺朕自躬傳神器  
勉狗人謀戢干戈而寧耀武威撫夷狄而但修文德而  
契丹見利忘義負約渝盟大為猾夏之灾屢肆窺邊之  
暴須為民而除害遂將命以伐戎駐五輅於大河勞六  
師於極塞賴乾坤祐助社稷威靈將相一心貔貅戮力  
致羣兇之敗衄血滿平川使元惡之奔逃魂消廣漠今

則朔陸稍靜中夏小康宜上答於穹昊俾特施於赦宥  
用導和平之氣適符長養之風可大赦天下開運二年  
五月二十一日昧爽已前應三京鄴都諸道州府見禁  
囚徒除十惡五逆持杖殺人強盜官典犯賊合造毒藥  
屠牛鑄錢偽行印信外其餘罪犯已發覺未發覺已結  
正未結正咸赦除之諸色配流人除終身勿齒并縱逢  
恩赦不在放還人及曾為盜賊并自契丹內來諸色人  
已於諸處收管外其餘配流人并常知所在者並放歸

其開運二年正月一日後來配流人等不在放還之限  
兵戈之地可料傷殘惻隱之心不捨晝夜所宜優惜用  
恤疲羸應常定刑具相并鄴都已北管界自今年契丹  
犯境已來有人戶實經虜殺劫人者所通檢到夏苗十  
分已令減放二分苗子并公徵錢物今更特減放一分  
其今年徵正稅錢物等亦與十分內減放二分行幸之  
時往來之處奉迎不闕供億實繁宜示渥恩以獎勤效  
應滑澶兩州迎奉車駕并公路供頓官員職掌等仰逐

處具名銜申奏當與加恩出師已來遇敵之處忠烈之士皆效命以衝鋒行陣之間遂捐身而報國宜加延賞用慰貞魂應北面行營將士等除已與加恩及第支賜優應給外其有沒於王事者職員宜令逐處分析聞奏當議超加褒贈子孫已有官者當與叙用其節級長行等如有親男堪充征行者宜令逐處酌量配軍收管支給衣糧戎夷侵軼驅脅吏民雖陷敵庭旋歸漢境所宜慰納以示綏懷應近北沿邊州縣軍鎮官員職掌被契

丹脅擁入蕃得便逃得歸來者竝放罪仍仰切加安撫  
睹彼易水最處邊陲經戎虜之攻圍賴軍民之固守將  
校齊一生聚保全念此忠勇宜加旌賞具易州被契丹  
圍逼之時應在州守把城池刺史官員職掌等仰具名  
銜申奏竝與加恩征討之際饋運之民不唯飛輓之勞  
或有抄截之患宜令存恤用示優弘應鎮定邢維先差  
隨軍運糧百姓偶有不迴者委逐處用勘如有此色其  
本戶骨肉切加安撫免三年差徭做擾之際輕俠之徒

而偶聚盜於荏蒲遂亡命於山澤宜令招携俾復農桑  
訪聞鄆齊棣等州管界及河北諸縣百姓內有昨因蕃  
賊入界接便為非今遇安寧怕罪未來歸業者宜令逐  
處長吏徧行榜示告諭所有今月一日已前罪犯一切  
不問宜令並放歸田業各務營生仍委縣鎮鄉村切加  
安撫不得恐動如告諭後過百日不來歸業仍前為惡  
者復罪如初逃背軍都誠為極罪誅夷家口乃是常刑  
將議寬矜并從捨釋應諸州府見禁及本營枷項并常

知所在諸軍逃走兵士家口等並宜釋放場院積弊官吏承寬致課額之逋懸勞朝廷之徵督久淹刑獄深軫予懷爰示優容俾令除放其安邑解縣兩池前催鹽使王居敏王景遇禁盤鹽欠折軍將兩界逋懸累年禁繫宜令三司各詳逐人所欠如有人家業錢填納者可與盡底據數納官餘欠並本人並放如有欠負錢物數內全無家業錢物填納者宜與免死配送邊遠諸處收管仍永不得差使所欠特放河中府雍同華陝虢等州管



界內人戶有欠王居敏王景遇盤鹽脚價者竝特放於  
戲鴈磧方秋稍息烟塵之患雞竿肆赦是覃雷雨之恩  
更賴文武大臣中外宿德或決策巖廊之上或提戈軍  
旅之間嘗膽為懷摧凶是念速除餘孽共集殊勲克致  
澄清永銷氛穢仍遣赦書日行五百里敢有以赦前事  
相擾告者以其罪罪之布告遐邇當體朕懷

冊府元龜卷九十四